

columngradusklets

Brief van Gradus an zin bruur in Canada

ÉÉN APRIL

Beste bruur Bertus, 't Was mien bedoeling um mien stukske van vandaag as april-mop te maken. Zo vaak vilt één april neet op 'n zondag. Boavendien wilde ik de warme banden tussen 't bestuur van Olde lesselstreek en mien nog wat steviger anhalen. Geet neet deur. Ze gaon op schoolreisje. Iedereen spreakt d-r zowat schande van umdat 't tweedaagse tripje zon zeuvenhonderdvieftig euro de man kost. "Congres" numen politici dat as ze ons geld in zon korte tied verbrassen. Uut

Olde lesselstreek gaon ze met college en fractievezitters. Dus zeg maor zon man/vrouw of tien. Mooi achtduzend eurootjes zun wi-j armer as dat kotte uut-stapje veurbi-j is. Ik snapte neet weurum D'66 en CDA an disse uutspatting metdeien. Normaal keffen ze wel van zich af as geld oaver de balk wudt gesmetten. Ik heb echter begreppen dat hun bi-j dit schoolreisje wat bie-zunders is toegezegd as ze hun waffel hollen: zi-j maggen bi-j 't raempke zitten. Ik had ze graag uitgezwaaid bi-j 't vertrek en ze nog stiekum 'n Mars toegestopt. Dat was echter neet neudig. 't Busje ging heel vrog. Um 't schoolreisje compleet te maken gaon ze onderweg nog effen an

bi-j "De Bedriegertjes". Lekker olderwets lachen en goed veur de teamgeest. Daor kriegten ze al patat met appelmoes van ons. Den Mars zol dus te vol van 't goeie zun. Ook heurde ik dat ieder wel 'n eigen bi-jdrage kon leveren. Das tegenwoordig heel gewoon bi-j schoolreisjes vanweage de bezu-nigingen. Veur vol arme gezinnen is dat 'n rib uut 't lief. Veur 'n politicus geldt dat neet. As 'n politicus geld uitgif is dat van 'n ander. Dan is hi-j/zi-j d-r ook neet zo an gehecht. Zeg now zelf: 'n normaal mens zol d-r toch neet oaver peinzen um zovol geld uut te geven veur twee dagen Den Haag! Dan zol iedereen zeg-gen daj de goodwies kapot hebt.

As 't echter geld van 'n ander is..... och, wat mik 't dan ook uut. En ik had zo'n leuk plannetje as april-mop. Ik wol schrieven dat op disse zondagmiddag um dri-j uur Sinterklaos naor de DRU kump. Daor is in den pas veur 'n paar griepstuffers opgekalefaterde evenementenhal 'n Paosmarkt. Now had ik bedacht dat iedereen den Sinterklaos mien brief van disse weak liet zien 'n wèerdebon zol kriegten van vieftig euro. Dat zol ik 'n betje geleufwèerdig maken met 'n lulverhaal oaver sponsors, promotie en meer van die onzin. Uuteindeluk mot 't onwarschienluk blieven, anders is 't gin april-mop. Ik dei dit um mien vrinden van de DRU te matsen.

Zollen ze nog wat extra bezu-kers kriegten. Zon goeie sul is Gradus now éénmaol. As ik gezegd had dak tien tripjes van twee daag ter weerde van zeuvenhonderdvieftig euro zol weg-geven had niemand mien geleufd. Toch is dit gin april-mop. Jammer alleen dat wi-j uiteindeluk de Sinterklaozen zun die 't weggeven.

De groeten an Ans en de blagen van ow bruur

Gradus Klets

